

清誥授奉政大夫國史循良列傳陝西留壩廳同知陳君墓表

桐城吳汝綸撰文

留壩同知陳君旣卒之二年陝西巡撫上其績狀於朝有詔宣付史館其兄大名知府署保定知府啟泰捧詔書以泣曰吾弟幸永不死雖然顯於朝而晦於野卽後進何觀宜得知友文字表於墓道之阡用昭示來禩遂以狀授汝綸汝綸則爲銘曰君諱文黻厥姓曰陳勔庭其字世長沙人諸生從軍累官同知饋餽征人壹絕奸欺權釐白河人曰利藪砥節營職官羸商阜補官留壩攝鄆縣大開縣門哦誦經卷民來訴訟釋卷裁決滯獄

數百再月而絕留壩僻陋介萬山中西走隴蜀綰轂其衝民苦
繁徭史斂孔棘貰貸子錢倍稱取息君壹汰蠲出錢假民準物
若衣予期贖歸少取息錢以更徭費豪富失氣徭亦辦治蓋君
治民首乃富之其富無方惟士是宜田少食艱教民蠶桑募師
給種董戒使成成絲不織教之機杼收債絲帛使咸鼓舞地力
未盡教之藝茶茶絲並興傾戎走華國家柔遠開關互市方外
環貨日月以至或益軍國而害人身腴吾利源納之弱貧吾國
之產惟茶惟絲攙雜濫惡遠賈不求求吾苗種挾以西邁自植
其國與我爭利印茶倭絲徧行西域羶罽加非流入吾國厥弊

曷由由吾自病已利不有坐授人柄使凡爲吏盡如君才桑茶
滿衍利權自持爲吾國重夫豈微哉最君吏能異蹟實繁絲茶
之效其尤著云值歲大饑躬民疾苦便宜發粟以活餓者携持
錢米假與下戶冒涉沮洳浸淫溽暑施粥近郊雜作傭保舍中
均食日粥一盂自秋徂春流冗四歸官錢不足私產佐之私財
又匱繼以假貸旣所救振民忘災困君負私券至八百萬嗣是
終任一無饑歲民以絲茶用益饒矣君之始至民不知學學附
鳳縣入者麟角君唱其教購書聘師進高材生而面迪之已而
橫舍學子莘莘鳳縣學籍半留壩人大吏上言專立學官留壩

有學建始惟君山邑崎嶇盜所逋迹得黨魁名捕其曹盜攝
不入入輒捕獲嗣是終任一無刼略武則盜弭文乃育才匪直
富民文武具能留壩十年官滿且遷遮留不可泣繞行旃老幼
扶掖闐市溢廛祖餞未還遽以喪告輟耕罷市走哭相弔或五
晝夜踣九百里會喪長安若戚在已控於大官請立祠堂載事
於碑以永不忘臚陳治行上之太史遺愛在民至於如此謂宜
壽考厥施大遐年未五十天平命耶君積資勞進秩知府授君
告身朝議大夫君之卒年光緒壬辰妻李繼梁皆封淑人存質
存實君之二子卜葬某原祔以前母狀君行者君兄啓泰御史

出守有聲中外由會及考以啓泰貴贈如其官每進益大我表
君阡匪詳伊概賢兄之思用式良吏